

პროფესიონალ ბუღალტერთა ინსტიტუტის შინაგანაწესი

საქართველოს პროფესიონალ ბუღალტერთა და აუდიტორთა ფედერაციის
სასერტიფიკაციო პროგრამის ტრენინგების მსმენელებისთვის

სტატუსი

შეზღუდული პასუხისმგებლობის საზოგადოება „პროფესიონალ ბუღალტერთა ინსტიტუტი“ (შემდგომი ინსტიტუტი) შექმნილია საქართველოს პროფესიონალ ბუღალტერთა და აუდიტორთა ფედერაციის (ბაფი) მიერ, „მეწარმეთა შესახებ“ საქართველოს კანონის 44-ე მუხლის საფუძველზე. ინსტიტუტი დაფუძნებულია 2000 წლის 6 ნოემბერს (ბაფის გამგეობის სხდომის ოქმი #8) და რეგისტრირებულია თბილისის დიდუბე-ჩუღურეთის რაიონის სასამართლოს მიერ 2000 წლის 13 დეკემბერს.

ინსტიტუტის იურიდიული მისამართი: თბილისი, აკ. წერეთლის გამზ. #61.

მმართველობის ორგანო

ინსტიტუტის მმართველობის ორგანოებია:

- შეზღუდული პასუხისმგებლობის საზოგადოების პარტნიორთა კრება;
- ინსტიტუტის დირექცია.

ინსტიტუტის ხელმძღვანელობა ევალება და წარმომადგენლობის უფლებამოსილება გააჩნია დირექტორს.

მიზანი და საქმიანობის საგანი

ინსტიტუტის ძირითადი მიზანია ბუღალტერთა ბაფის სასერტიფიკაციო პროგრამაში მონაწილე კანდიდატების გამოცდებისათვის მომზადებაში მხარდაჭერა. ეს მიზანი არ გამოირჩევა სხვა პირების უფლებას მიიღოს განათლება და აიმაღლოს კვალიფიკაცია სასერტიფიკაციო პროგრამაში მონაწილე კანდიდატად რეგისტრაციის გარეშე.

ინსტიტუტის ძირითადი მიზნიდან გამომდინარე, მისი საქმიანობის საგანია ტრენინგების ჩატარება სასერტიფიკაციო პროგრამით გათვალისწინებულ დისციპლინებში (შემდგომ მოდულები).

ინსტიტუტი ტრენინგებს ახორციელებს ქართულ და ინგლისურ ენებზე.

ტრენინგში მონაწილეობის წესი

ტრენინგში მონაწილეობა შეუძლია პირს, რომელსაც აქვს ბაკალავრის ან მასთან გათანაბრებული აკადემიური ხარისხი, საქართველოში ან უცხოეთში მოპოვებული აქვს ბაკალავრის ან მასთან გათანაბრებულ საფეხურზე სწავლის უფლება ან, რომელიც პროფესიული განათლების V საფეხურის კვალიფიკაციის მფლობელია.

ტრენინგში მონაწილეობის მსურველმა პირადი განცხადების საფუძველზე რეგისტრაცია უნდა გაიაროს ინსტიტუტში. რეგისტრირებული პირი იწოდება მსმენელად.

ტრენინგში მონაწილეობის მსურველმა პირმა განცხადებასთან ერთად უნდა წარადგინოს შემდეგი დოკუმენტები:

- უმაღლესი ან პროფესიული განათლების დიპლომის ქსეროასლი (თუ უმაღლესი ან პროფესიული სასწავლებელი დამთავრებული აქვს);
- ცნობა უმაღლესი სასწავლებლიდან სტუდენტობის შესახებ (თუ უმაღლესი სასწავლებელი დამთავრებული არა აქვს);
- ანკეტა (ინსტიტუტის მიერ დადგენილი ფორმით);
- პირადობის მოწმობის ქსეროასლი;

პროგრამაში მონაწილეობის მსურველი პირი დირექტორის ბრძანებით დარეგისტრირდება ინსტიტუტში და მიენიჭება მსმენელის სტატუსი.

ინსტიტუტი უფლებამოსილია:

- უარი უთხრას პირს დარეგისტრირებაზე, თუ ის არ აკმაყოფილებს ინსტიტუტის ტრენინგებში მონაწილეობის პირობებს ან/და სრულყოფილად არ წარმოადგენს მოთხოვნილ დოკუმენტებს;
- გაატაროს დისციპლინარული ზომები იმ მსმენელების მიმართ, რომლებიც დაარღვევენ შინაგანაწესით დადგენილ წესებს.

ინსტიტუტში მსმენელების დარეგისტრირება ხდება წელიწადში ორჯერ: თებერვალსა და სექტემბერში.

ტრენინგების პროგრამა

ტრენინგების პროგრამა აგებულია ACCA-ს საკვალიფიკაციო პროგრამაზე, რომელიც ქართულ ენაზე ადაპტირებულია ბაფის მიერ.

პროგრამა ითვალისწინებს 14 მოდულის შესწავლას.

ტრენინგების პროგრამა მოიცავს, მსმენელის სურვილის გათვალისწინებით, მისი ცოდნის შეფასებას გამოცდის ჩაბარებით. გამოცდებში მონაწილეობა სავალდებულო არ არის. გამოცდის მიზანია დაეხმაროს მსმენელს იმის შეფასებაში, რამდენად საფუძვლიანად არის მომზადებული ბაფში გამოცდების ჩასაბარებლად.

გამოცდა ტარდება სემესტრის ბოლოს, იანვარსა და ივნისში, სამუშაო ან/და დასვენების დღეებში, დილის საათებში. მსმენელს გამოცდაზე ტესტების ამოსახსნელად ეძლევა 2-3 ასტრონომიული საათი.

გამოცდის მიზანი არ არის მსმენელის ცოდნის შეფასება, მისთვის ცოდნის დამადასტურებელი დოკუმენტის გასაცემად. თუმცა იგი შესაძლებელია გამოყენებული იქნეს ამ მიზნით ქვემოთ აღწერილ შემთხვევაში.

პროგრამის თოთხმეტევე მოდულის დასრულების შემდეგ, მსმენელი მიიღებს პროგრამის დასრულების დამადასტურებელ სერტიფიკატს თუ შესრულებული იქნება ორივე პირობა:

- ა) მსმენელი მონაწილეობდა პროგრამის თოთხმეტევე მოდულის ტრენინგში და გამოცდებში; და
- ბ) ინსტიტუტის მიერ დადგენილი ცოდნის შეფასების წესების შესაბამისად გადალახული ექნება მინიმალური კომპეტენციის ზღვარი.

ტრენინგები

ყოველ მოდულში ტრენინგი ტარდება სასწავლო სემესტრის განმავლობაში. ყოველ სემესტრში ტრენინგი ჩატარდება ყველა მოდულში. სემესტრი მოიცავს 4-4,5 კალენდარულ თვეს (ინგლისურ სექტორში 3-3,5 კალენდარული თვე). სემესტრი იწყება თებერვალსა და სექტემბერში.

ტრენინგები ტარდება როგორც სამუშაო, ისე გამოსასვლელ დღეებში. სამუშაო დღეებში ტრენინგი მიმდინარეობს 18:10 საათიდან 21:10 საათის ჩათვლით. გამოსასვლელ დღეებში ლექციები ინიშნება 10 საათიდან.

ჯგუფების შესაქმნელად გამოიყენება შემდეგი პრინციპი:

- მოდულის შერჩევა უნდა მოხდეს ინსტიტუტის მიერ გამოცხადებულ ვადებში;
- ჯგუფში მსმენელების რაოდენობა არ უნდა აღემატებოდეს 30-ს.
- ჯგუფი არ შეიქმნება 8-ზე ნაკლები მსმენელისათვის.

მსმენელის უფლება-მოვალეობები

მსმენელი ვალდებულია:

- გააფორმოს ხელშეკრულება ინსტიტუტთან;
- აირჩიოს შესასწავლი მოდული და დაესწროს ტრენინგს არჩეული გრაფიკის მიხედვით;
- შეასრულოს ტრენინგთან დაკავშირებული მითითებები და დავალებები;
- გადაიხადოს ტრენინგის საფასური ხელშეკრულების შესაბამისად;
- არ მოსწიოს სიგარეტი ინსტიტუტის შენობაში;
- დაიცვას ინსტიტუტის შინაგანაწესი.

მსმენელი უფლებამოსილია:

- მიაწოდოს წინადადება ინსტიტუტის ხელმძღვანელობას, ტრენინგების გაუმჯობესების ღონისძიებების შესახებ;
- მონაწილეობა მიიღოს შუალედურ ტესტირებასა და სემესტრულ გამოცდაში;
- მომდევნო სემესტრში განმეორებით ჩააბაროს გამოცდა იმ მოდულში, რომელშიც პირველ ცდაზე გამოცდის შედეგად მიღებული არა აქვს დადებითი შეფასება;

ტრენინგის ფასი

ტრენინგები ფასიანია. ფასი დადგენილია მოდულების მიხედვით. ტრენინგის ფასის გადახდა ხდება სემესტრის დაწყებამდე ინსტიტუტის საბანკო ანგარიშზე ნაღდი ფულის შეტანის ან ჩარიცხვის გზით.

თუ სემესტრის დაწყების თვის ბოლომდე (განსაკუთრებულ შემთხვევებში - მომდევნო თვის 10 რიცხვამდე) მსმენელი მიმართავს ინსტიტუტის დირექციას ტრენინგში მონაწილეობის შეჩერების ან მომდევნო სემესტრ(ებ)ში გადატანის სურვილით, ტრენინგის ფასის $\frac{1}{4}$ მიეკუთვნება მსმენელის მიერ მიღებულ მომსახურებას, ხოლო დანარჩენი თანხა მსმენელს უბრუნდება ან ენახება ტრენინგის გასაგრძელებლად დაბრუნებამდე. ამ ვადის ამოწურვის შემდეგ მსმენელს ტრენინგისათვის გადახდილი თანხა არ უბრუნდება და არ ენახება ტრენინგის გასაგრძელებლად დაბრუნების დროისათვის.

ერთსა და იმავე მოდულში განმეორებითი ტრენინგის მსურველი მსმენელისთვის, ფასი განისაზღვრება ტრენინგისათვის დადგენილი ფასის 50 პროცენტის ოდენობით.

ინსტიტუტი უფლებამოსილია:

- დაადგინოს განსხვავებული ტრენინგის ფასი მოდულებისა და სექტორების მიხედვით;
- შეცვალოს დადგენილი ფასი წინა ცვლილებიდან ერთი წლის შემდეგ 10 პროცენტამდე ოდენობით.

დისციპლინური ზომები

ვალდებულებების არაჯეროვანი შესრულების შემთხვევაში, მსმენელის მიმართ ინსტიტუტის ხელმძღვანელობის მიერ გამოიყენება დისციპლინური ზომები. დისციპლინური ზომა მიმართულია მსმენელის ეთიკური ნორმების დაცვის უნარ-ჩვევების გამოსამუშავებლად.

ინსტიტუტის ადმინისტრაცია უფლებამოსილია, გამოიყენოს უმაღლესი ადმინისტრაციული ზომა - მსმენელისათვის ტრენინგებში მონაწილეობის უფლების ჩამორთმევა. უმაღლესი ადმინისტრაციული ზომა გამოიყენება, თუ მსმენელი:

- დაარღვევს სახელშეკრულებო პირობას, ტრენინგის საფასურის გადახდასთან დაკავშირებით;
- შემჩნეული იქნება ინსტიტუტის შენობაში სიგარეტის მოწევაში ან სხვა მსმენელისათვის შეუფერებელ ქცევაში და დისციპლინის დარღვევაში.

დაუშვებელია ტრენინგებში მონაწილეობის უფლება ჩამორთმეული მსმენელის უფლებების აღდგენა.

გარდამავალი დებულებები

ამ შინაგანაწესის ძალაში შესვლამდე მოქმედი შინაგანაწესის შესაბამისად:

- ინსტიტუტში რეგისტრირებული სტუდენტების სტატუსი იცვლება მსმენელის სტატუსით;
- ინსტიტუტიდან გარიცხული სტუდენტისათვის მსმენელის სტატუსის აღდგენა მოხდება საერთო წესით - აღდგენის საფასურის გადახდის გარეშე.

ძალდაკარგულად ითვლება ამ შინაგანაწესის ძალაში შესვლამდე ინსტიტუტსა და სტუდენტს შორის გაფორმებული ხელშეკრულების ის ნაწილი, რომელიც არეგულირებდა სასწავლო პროცესის გაგრძელების ვალდებულების შეუსრულებლობისათვის სტუდენტის გარიცხვისა და ნებისმიერი მიზეზით გარიცხული სტუდენტის სტატუსის აღსადგენად აღდგენის საფასურის გადახდის საკითხებს.

ძალაშია 2018 წლის 02 ივლისიდან.